

## ESSAIS DE M. DE MONTA.

trement recité en la vie de Flaminius, autrement en celle de  
 Pyrrhus. Mais de le charger d'auoir pris pour argent content,  
 des choses incroyables & impossibles, c'est accuser de faute  
 de iugement, le plus iudicieux autheur du monde. Et voicy  
 son exemple: comme, ce dit-il, quand il recite qu'un enfant de  
 Lacedemone se laissa deschirer tout le ventre à un renardeau,  
 qu'il auoit desrobé, & le tenoit caché sous sa robe, iusques à  
 mourir plustost que de descourir son larecin. Je trouue en  
 premier lieu cet exemple mal choisi: d'autant qu'il est bien  
 mal-aisé de borner les efforts des facultez de l'ame, là où des  
 forces corporelles, nous auons plus de loy de les limiter & co-  
 gnoistre: & à cette cause si c'eust esté à moy à faire, i'eusse plu-  
 stost choisi un exemple de cette seconde sorte: & il y en a de  
 moins croyables, Come entre autres, ce qu'il recite de Pyrrh<sup>o</sup>,  
 que tout blessé qu'il estoit, il donna si grand coup d'espée à  
 un sien ennemy armé de toutes pieces, qu'il le fendit du haut  
 de la teste iusques au bas, si q le corps se partit en deux parts.  
 En son exemple ie n'y trouue pas grand miracle, ny ne reçois  
 l'excuse de quoy il couure Plutarque, d'auoir adiousté ce mot  
 (comme on dit) pour nous aduertir, & tenir en bride nostre  
 creance. Car si ce n'est aux choses receuës par autorité & re-  
 uerence d'ancienneté ou de religion, il n'eust voulu ny rece-  
 uoir luy mesme, ny nous proposer à croire, choses de foy in-  
 croyables: & que ce mot (comme on dit) il ne l'employe pas  
 en ce lieu pour cet effect, il est aysé à <sup>voir</sup> iuger par ce que luy mes-  
 me nous raconte ailleurs sur ce subiect de la patience des en-  
 fans Lacedemoniës, des exemples aduenuz de son temps plus  
 mal-aisez à persuader: Comme celuy que Cicero a tesmoigné  
 aussi, auât luy, pour auoir, à ce qu'il dict, esté sur les lieux mes-  
 mes. Que iusques à leur temps, il se trouuoit des enfans en cet-  
 te preuue de patience, à quoy on les essayoit deuant l'autel de  
 Diane, qui souffroyét d'y estre foytez iusques à ce que le sang  
leur